

新纂雲南通志

第二函
第十冊

新纂雲南通志卷一百七十八目錄

名宦傳一

漢

陳立 王尊 孫寶

後漢

文齊 鄭純 朱輔 張翕 王阜

張喬 楊竦 种暉 馮顥 李頤

麗芝

景毅 張亮則 劉寵 曹鸞

王蜀漢

董和 費詩 諸葛亮 馬忠 張嶷

王伉 霍弋

晉

杜軫

王化

李毅

女秀

趙混

毛孟

王遜

姚崇

謝恕

周楚

宋

吉翰

陸徽

劉秀之

南齊

蕭鑑

梁

徐文盛

北周

宇文憲

隋

梁 睿 梁 毗

唐

韋仁壽 趙孝祖 韓思彥 韋 阜

元

兀良合台 郝天挺 張立道 賽典赤瞻思丁 愛 魯

納速刺丁 怯 烈 也罕的斤 趙世延 也先不花

朶兒赤 忙古帶 程思廉 劉 正 忽 辛

李 京 躍里帖木兒 支渭興 楊 祚

述律杰 三旦八 張 瑾

新纂雲南通志卷一百七十八

名宦傳一

周李范鄂四志僅列名宦

劉志稱
宦賢

而阮岑兩志秩官志於名宦外更標

循吏一門以曾入祠者編爲名宦未入祠而卓著循聲者編爲循吏然兩門政績多相伯仲其入祠與否亦有幸有不幸耳茲仿周李范鄂四志例概稱名宦而以忠烈附焉

漢

陳立字少遷蜀郡臨邛人前爲連然長不韋令蠻夷畏之成帝河平中夜郎王興與鉤町王禹漏臥侯俞更舉兵相攻遣大中大夫張匡持節和解興等不從命刻木像漢吏立道旁射之時立爲金城司馬大將軍王鳳薦立爲牂柯太守及至從吏數十人出行縣至興國日

同亭召興數責因斷頭諸夷震恐降立還郡興妻父翁指與興子邪務收遺兵迫脅旁二十二邑反立與都尉長史分將攻之翁指據院爲壘立使奇兵絕其饗道縱反間以誘其衆都尉萬年曰兵久不決費不可供迺引兵獨進敗走趨還營立怒叱戲下令格之都尉復戰立援之時天大旱立絕其水道蠻夷共斬翁指持首出降立已平定

西夷徵詣京師

參漢書西南夷傳常璩華陽國志蜀郡士女讚

按阮志秩官志循吏門首列漢武帝時吳霸

岑志同

然攷後漢書西南

夷傳霸爲牂柯太守無政績可指故不錄仍照范鄂兩志以陳立

冠首

王尊字子贛涿郡高陽人爲郡決曹史轉校尉坐擅離部署免後起爲郿令遷益州刺史先是瑯邪王陽爲益州刺史行部至邛崃九折

阪歎曰奉先人遺體奈何數乘此險後以病去及尊爲刺史至其阪問吏曰此非王陽所畏道邪吏對曰是尊叱其馭曰驅之王陽爲孝

子王尊爲忠臣尊居部二載懷來徼外蠻夷歸附其威信

漢書本傳

孫寶字子嚴潁川鄆陵人以明經爲郡吏後署主簿御史大夫張忠薦之爲議郎遷諫大夫鴻嘉中廣漢羣盜起選爲益州刺史劾廣漢太守扈商爲商誣奏免益州吏民多陳寶功效上復拜爲冀州刺史後益州蠻夷犯法巴蜀頗不安上以寶著名西川拜爲廣漢太守秩中二千石賜黃金三十斤蠻夷安輯吏民稱之

漢書本傳

按阮志循吏門有王尊孫寶

岑志同

而唐志以益州與益州郡牽混削

之不知犍爲越嶲益州牂柯四郡俱屬益州益州郡爲今雲南地固已即犍爲越嶲牂柯三郡屬縣亦有在今雲南者益州刺史管

轄甚寬尊之懷來徼外蠻夷歸附其威信寶之民多陳功效不得謂與雲南無關也故照阮志採入

後漢

文齊字子奇廣漢梓潼人西漢平帝末以城門校尉爲犍爲屬國遷益州太守造起陂池開通灌溉墾田二千餘頃率屬兵馬修障塞降集羣夷甚得其和及公孫述據益土齊固守拒險述拘其妻子許以封侯齊終不降聞光武即位乃間道遣使自聞蜀平徵爲鎮遠將軍

封成義侯於道卒詔爲起祠堂郡人立廟祀之

參後漢書西南夷傳華陽國志梓潼士女讚

鄭純字長伯廣漢郫人爲益州西部都尉地出金銀琥珀犀象翠羽作此官者皆富及十世純獨清廉毫毛不犯夷貊君長感慕皆獻土珍頌德美明帝嘉之乃改西部爲永昌郡以純爲太守純與哀牢邑

人約邑豪歲輸布貫頭衣二領鹽一斛以爲常賦夷俗安之在官十

年卒列畫頌東觀

參後漢書西南夷傳華陽國志廣漢士女讚

朱輔梁國甯陵人永平中爲益州刺史好立功名慷慨有大略在州數歲宣示漢德威懷遠夷自汝山以西前世所不至正朔所未加白狼槃木唐菽等百餘國舉種奉貢稱臣僕迺上遠夷樂德慕德懷德之歌上嘉之事下史官錄其歌焉

後漢書西南夷傳

張翕字叔陽巴郡安漢人永平間爲越雋太守政化清平得夷人和在郡十七年卒夷人愛慕如喪父母蘇祁叟二百餘人齎牛羊送喪至安漢起墳祭祀詔書嘉美爲立祠堂安帝元初六年天子以張翕有餘愛乃拜其子湍爲太守夷人懽喜奉迎道路曰郎君儀貌類我府君後湍頗失民心有欲叛者耆老相曉語曰當爲先府君故遂以

得安

參後漢書西南夷傳華陽國志先漢以來士女目錄

王阜

後漢書西南夷傳作追

字世公蜀郡成都人察舉孝廉爲重泉令肅宗元和中

遷益州太守政化尤異有神馬四匹出滇池河中甘露降白鳥見始

興起學校漸遷其俗民懷之如父母

參後漢書西南夷傳華陽國志蜀郡士女讚

張喬南陽人安帝初爲益州刺史元初五年以卷夷大牛種封離等

反畔殺遂久令明年永昌益州及蜀郡夷皆叛應之衆遂十餘萬破

壞二十餘縣殺長吏燔燒邑郭剽略百姓骸骨委積千里無人詔喬

選堪能從事討之喬乃遣從事楊竦將兵至葉榆擊之延光二年春

旄牛夷叛攻零關殺長吏喬與西部都尉擊破之於是分置蜀郡屬

國都尉領四縣如太守

後漢書西南夷傳

楊竦字子恭蜀郡成都人安帝元初六年爲益州從事時封離等畔

刺史張喬以竦勇猛遣擊之至葉榆賊盛未敢進先以詔書告示永昌等三郡密求武士重其購賞乃進軍與封離等戰大破之斬首三萬餘級獲生口千五百人資財四千餘萬悉以賞軍封離等惶怖斬其同謀渠帥詣竦乞降竦厚加慰納其餘三十六種皆求降附竦因奏長吏姦猾侵犯蠻夷者九十人皆減死論功未及上會竦病創卒

張喬深痛惜之乃刻石勒銘圖畫其像

參後漢書西南夷傳華陽國志蜀郡土女讚

种暠字景伯河南洛陽人始爲縣門下史召署主簿遂舉孝廉順帝時累遷益州刺史暠素慷慨好立功立事在職三年宣恩遠夷開曉殊俗岷山雜落皆懷服漢德其白狼槃木唐菟邽楚諸國自前刺史朱輔卒後遂絕暠至乃復舉種向化

後漢書本傳

按阮志循吏門种暠後尙有趙溫謂其爲越雋太守

岑志同

然考後漢

書板楯蠻傳及華陽國志巴志溫爲巴郡太守非越雋也與雲南無關故不錄

馮顥字叔宰廣漢郫人順桓間爲越雋太守政化多異迹

參後漢書西南夷傳華陽國志廣漢士女

讚

按馮顥范鄂阮岑唐五志俱作馮灝而阮岑兩志謂其任永昌太

守

范鄂志同

亦與所據之書不合茲據後漢書華陽國志改正

李顥字德卬巴郡墊江人初爲太尉掾靈帝熹平五年益州諸夷反叛執太守雍陟遣御史中丞朱龜討之不能克朝議以爲郡在邊外蠻夷喜叛勞師遠役不如棄之顥獨建策討伐乃拜顥益州太守與

刺史龐芝發板楯蠻擊破平之還得雍陟顥後卒於郡

參後漢書西南夷傳華陽國志先漢以來士女目錄

按李顥阮岑志俱作李容蓋兩志纂於嘉慶後以避清仁宗諱故

也茲據後漢書華陽國志改正作顒

景毅字文堅廣漢梓潼人李顒卒後夷人復叛以毅爲益州太守討定之承喪亂後民夷困餓毅初到郡米斛萬錢漸以仁恩少年間米

至數十錢云

參後漢書西南夷傳華陽國志南中志梓潼士女讚

張亮則字元修南鄭人靈帝時爲牂柯太守威著南土永昌越巂夷謀欲反畏亮則換臨其郡相諫而止號曰臥虎以戍狄勳遷護羌校

尉

華陽國志

按張亮則唐志據華陽國志漢中士女讚作張則然攷華陽國志南中志及先漢以來士女目錄皆作張亮則三占從二仍以張亮則爲是

又按阮志名宦門張亮則後尙有欒巴

岑志

然攷後漢書欒巴傳巴

謫永昌太守辭病不行是巴未嘗至永昌也故不錄

劉寵字世信綿竹人出自孤微以明公羊春秋上計闕下見除成都令政教明肅遷牂柯太守初乘一馬之官布衣蔬食儉以爲教居郡

九年乘之而還吏人爲之立銘

華陽國志廣漢士女讚

曹鸞靈帝時爲永昌太守熹平五年上書大訟黨人言甚方切

阮岑志作方切

帝省奏大怒即召司隸益州檻車收鸞送槐里獄掠殺之

後漢書黨錮傳

按阮志名宦門曹鸞下標其所據之書曰後漢書靈帝本紀

岑志同

查

所錄曹鸞數語係出後漢書黨錮傳非靈帝紀也特改正

蜀漢

董和字幼宰南郡枝江人漢末率宗族西遷益州牧劉璋以爲成都令蜀土富實時俗奢侈和躬率以儉惡衣蔬食防遏踰僭爲之軌制

所在皆移風變善畏而不犯遷益州太守其清約如前與蠻夷從事務推誠心南土愛而信之先主定蜀徵爲掌軍中郎將與軍師將軍諸葛亮並署左將軍大司馬府事獻可替否共爲歡交自和居官食祿外牧殊域內幹機衡二十餘年死之日家無儋石之財

三國志蜀志本傳

費詩字公舉犍爲南安人劉璋時爲綿竹令先主既定成都領益州牧以詩爲督軍從事出爲牂柯太守還爲州前部司馬後羣臣議欲推漢中王稱尊號詩上疏曰殿下以曹操父子偪主篡位故乃羈旅萬里糾合士衆將以討賊今大敵未克而先自立恐人心疑惑昔高祖與楚約先破秦者王及入咸陽獲子嬰猶懷推讓況今殿下未出門庭便欲自立邪愚臣誠不爲殿下取也由是忤指左遷部永昌從

事

三國志蜀志本傳

諸葛亮字孔明瑯琊陽都人早孤從父玄爲豫章太守將亮之官後隨玄往依荊州牧劉表玄卒亮家於南陽之鄧縣號曰隆中躬耕隴畝好爲梁父吟每自比於管仲樂毅時先主屯新野自詣亮凡三往乃見以上客禮之先主得荊州以亮爲軍師中郎將建安十六年先主定蜀以亮爲軍師將軍署左將軍府事二十六年先主即帝位以亮爲丞相章武三年先主崩後主嗣立建興元年封亮武鄉侯開府治事頃之又領益州牧政事無巨細咸決於亮時益州大姓雍闓反流太守張裔於吳據郡不賓越雋夷高定亦背叛牂柯太守朱褒遂以郡叛應闓亮以新遭大喪未便加兵至三年春始率衆南征參軍馬謖送之數十里亮曰雖共謀之歷年今可更惠良規謖對曰南中恃其險阻不服久矣雖今日破之明日復反耳今公方傾國北伐以

事彊賊彼知官勢內虛其叛亦速若殄盡遺類以除後患既非仁者之情且又不可倉卒也夫用兵之道攻心爲上攻城爲下心戰爲上兵戰爲下願公服其心而已亮納之比至南中所在戰捷聞孟獲者爲夷漢並所服募生致之既得使觀營陣問曰此軍何如獲對曰向者不知虛實故敗今蒙賜觀若祇如此即易勝耳亮笑縱使更戰七縱七擒猶遣獲獲止不去曰公天威也南人不復反矣遂至滇池南中平皆即其渠率而用之或以諫亮亮曰若留外人則當兵兵留則無所食一不易也加夷新傷破父兄死喪留外人而無兵者必成禍患二不易也又夷累有廢殺之罪自嫌釁重若留外人終不相信三不易也今吾欲使不留兵不運糧而綱紀粗定夷漢粗安故耳四郡皆平亮改益州郡爲建甯郡分建甯永昌郡爲雲南郡又分建甯牂